



ՀԱՂՈՐԴԱԳՐՈՒԹԻՒՆ ՈՐՈՇՈՒՄ

Յարգարժան հայրենակիցներ,

Ժամանակը կ'անցնի արագընթաց քայլերով: 2020 թուականը **փոփոխություններու** տարի է ողջ աշխարհով մէկ, նաեւ հայութեան համար, մանաւանդ Արեւմտեան Հայաստանին համար:

Յատկապէս որ, Արեւմտեան Հայաստանի իրաւունքներն իրականացնելու իրաւաքաղաքական դաշտին վրայ գործող ուժերու զգալի մասը՝ գիտական ընկալումով չի' մօտենար ժամանակի գործօնին, այլ անխնայ կերպով **կը սպառէ մեր ազգի ներուժը**՝ թութակի նման կրկնելով ու վերստին կրկնելով ազգային իրաւունքներուն մասին խօսիլ եւ **միայն** խօսիլ, առանց հեռանկարի կամ գործնական ծրագիրի:

Ոմանք փրկութիւն կը գտնեն լոզունգներու կրկնութեան մէջ՝ երբ **գործնականի անցնելու պահին կը զգան իրենց ապիկարութիւնը**: Իսկ ոմանք ալ **յետին օրակարգով** կը փորձեն մեզ խօսքի աշխարհին մէջ սահմանափակել, կանխարգիլելու համար ազգային քաղաքական արդիւնաւետ գործնականի մեկնարկը:

Երկու պարագային ալ արդիւնքը մէկն է: Զոհերը ողբալով 100 եւ ավելի տարիները կորսնցնելէ ետք՝ եկող 100 տարիներուն ալ կ'ուզեն հայութիւնը այս անգամ **զբաղցնել իրաւունքներու մասին, միայն, խօսելով** :

* * *

Փաստացի եւ կատարուած իրողութիւն է 1920 թ.-ի Յունուար 19-ին **միջազգային անբեկանելի ճանաչում ստացած ՀԱՅԱՍՏԱՆ ՊԵՏՈՒԹԻՒՆ**-ը: Ուստի զայն կեանքի կոչելը, այսինքն իրաւականօրէն **շարունակուող պետութեան վերականգնումը**՝ իւրաքանչիւր հայու պարտականութիւնն է:

Այսօր **գրաւեալ** Արեւմտեան Հայաստանի (Հայաստան Պետութեան) ազատագրման եւ պետականութեան վերականգման իրաւաքաղաքական **միակ հիմքը** կը հանդիսանայ 1920-ի Հայաստան Պետութիւնը՝ որու իրաւականօրէն շարունակուող պետութեան **հանգամանքով** միայն կարելի է հանդէս գալ միջազգային քաղաքական եւ դիւանագիտական ատեաններուն դիմաց: Իսկ նման հանգամանքի իրականացման միակ օրինական եւ իրաւական ուղին՝ կ'անցնի **Ազգային ներկայացուցչական միակ լիազօր մարմինի** ստեղծման ճամբով:

Վերջին տասնամեակի ընթացքին Արեւմտեան Հայաստանի (Հայաստան Պետութեան) միջազգային իրաւունքի համապատասխան իրաւունքներու իրականացման ուղիով տարուած գործունէութիւնները գնահատելի էին եւ անհրաժեշտութիւն՝ բայց ոչ բաւարար: Գործնական փորձառութենէն մեկնելով կը փաստուի, որ իրաւականօրէն շարունակուող պետութեան ստեղծման այն բոլոր գնահատելի փորձերը թերի էին՝ յատկապէս **Ազգային ներկայացուցչական միակ լիազօր մարմինի բացակայութեան** պատճառով, նաեւ անգամ մը եւս՝ **մենատիրութեան** ձգտումներու, **ոչ միասնականութեան**, **քաղաքական տհասութեան**, **հեռագնայ ռազմավարութեան** չգոյութեան եւ **անգործունէութեան** պատճառներով:

Ուստի, ունենալով տարիներու փորձառութիւն՝ թէ որպէս ազգային եւ քաղաքական գործիչ, եւ թէ որպէս «Արեւմտեան Հայաստանի Հանրապետութիւն»-ը ներկայացնելու ձգտող կառոյցին «Վարչապետ»-ի պաշտօնով գործակցած ըլլալու հանգամանքով՝ այսօր պարտք կը զգամ իմ հայրենակիցներուս յայտնելու, որ 19 Յունուար 1920-ի Հայաստան Պետութեան վերականգման ճանապարհը թէեւ Արեւմտեան Հայաստանի ազատագրման իրաւաքաղաքական աշխատանքներու **միակ իրաւական հիմքն է**, սակայն անոր անհրաժեշտ **նախապայմանները** տակաւին կը մնան **թերահաս ու անկատար**: Հետեւաբար այդ ուղիով ընթացքը շարունակել պիտի նշանակէ գործել **կեղծարարութիւն եւ անպարկեշտութիւն** մեր իսկ սեփական ժողովուրդին նկատմամբ, նաեւ **խայտառակութիւն**՝ միջազգային ընտանիքին դիմաց:

Մեր ազգն **արժանի** է տիրանալու իր իրաւունքներուն: Նաեւ **պարտաւոր** է 19 Յունուար 1920-ին միջազգային ճանաչում ստացած Հայաստան Պետութիւնը վերականգնելու համար ալ՝ անոր միջոցով մղելու ազատագրման իրաւաքաղաքական աշխատանքներ, ըստ միջազգային օրենքներուն, բայց միայն **ճիշտ եւ օրինական** ձեւով, եւ ամենակարեւորը՝ **հաւաքական** գիտակցութեամբ եւ աջակցութեամբ:

Ոչ ոք իրաւունք ունի մեր ազգին՝ մանաւանդ գալիք սերունդներուն, ժառանգութիւն ձգելու կեղծիք եւ անբարոյութիւն:

Այս հիման վրայ ալ, ես՝ եւ «Արեւմտեան Հայաստանի Հանրապետութիւն» ըլլալու ձգտող հիմնարկի որջ կառավարութիւնը (7 անդամ), Սուրիոյ (բոլոր 4), Լիբանանի (բոլոր 4), ԱՄՆ-ի (բոլոր 4), Կանադայի (բոլոր 1) եւ Հայաստանի (մեծամասնութիւնը՝ 13) պատգամաւորներով՝ որոշեցինք մեր **գործնական կապակցութիւնները խզել** այդ հիմնարկին հետ, ընտրելով՝ մեր ազգային առաքելութիւնը **պարկեշտօրէն շարունակելու, թափանցիկ, ժողովրդավարական եւ համահայկական համագործակցութեան ուղիով**:

Մեր սոյն որոշումին մասին մանրամասնութիւններ կը հրապարակենք մօտակայ օրերուն, զայն յանձնելով մեր ազգային պատմութեան դատին:

Յարգանք,

Գառնիկ Վահագնի Սարգիսեան

24 Ապրիլ 2020